

LENGHE FURLANE: LE FEVELIN 444.000 PERSONIS

Su www.arlef.it al è a disposizion il volum cui risultâts de ricercje sociolinguistiche su la lenghe furlane “Tire fûr la lenghe”

Tal sît de ARLeF, te sezion “Materiâl”, e je a disposizion “**Furlan Contât**”, la publicazion che e da dongje i risultâts de ricercje sociolinguistiche “Tire fûr la lenghe”, realizade par analizâ **l’ûs de lenghe furlane** e di chês altris lenghis feveladis in Friûl. La indagjin e je stade fate tal 2023 di IRES FVG in colaborazion cul FEF e un comitat científic constituît di linguiscj des universitâts di Bolzan, Milan, Pavia, Trent e Vîgo (Galizie). Dopo vê mandât fûr une selezion di dâts che i ricercjadôrs a àn otignût cuntune prime fase di elaborazion e analisi, il volum, che al è stât editât par cure di IRES FVG in colaborazion cu la Agenzie, al met a disposizion de comunitât científiche, des istituzions e dai citadins un quadri analitic detaiât dai risultâts de ricercje. La ricercje, sostignude de Regjon Autonome F-VJ, e je stade realizade cul contribût de ARLeF inte suaze dal Plan gjenerâl di politiche linguistiche pe lenghe furlane 2021-2025.

Il studi si è fondât su passe **4.300 intervistis cjapadis sù in 178**

Comuns dal Friûl-V.J. e dal Venit orientâl midiant di un cuistionari di cent domandis, par plui a rispueste sierade. Ancje il contribût di 74 Istitûts Comprensifs al è stât fondamentâl graciis al supuart dai insegnants, che, di fat, a àn permetût che la indagjin e rivàs intes fameis.

Intal volum a vegnin presentâts la metodologjie doprade e i risultâts de grande cuantitât di dâts analizâts, cul supuart di taulis cartografichis e tabelis, dividudis daûr dai cjapitui: Famee, Comunitât, Competencis, Media, Ideologjie e Identitât. Cun di plui, la publicazion e ufris un confront cu lis ricercjis sociolinguistichis passadis e une serie di riflessions e di propuestis

pes politichis linguisticis futuris.
«*La publicazion – al evidenzie l’assessôr regionâl **Pierpaolo Roberti** – e rapresente pe Regjon une base concrete par planificâ une politiche linguistiche simpri plui efficace pal furlan, confermant il so impegn tal infuarti il so ûs e la sô difusion.*»
«*I dâts cjapâts sù – al à declarât il president de ARLeF, **Eros Cislino** – a son un imprest prezios par capî il stât di salût de lenghe furlane. Dome cul monitorâ in maniere rigorose e costante si puedin programâ strategjiis e intervents adats aes dibisugnis dal*



teritori e de sô comunitât linguistiche.»
La edizion di cjarte di “Furlan Contât” e vignarà donade in curt aes bibliotechis dal Friûl e ai esperts dal setôr.

I DÂTS PRINCIPÂI DE RICERCJE IN STRUC

Plui di 444 mil locutôrs atifs

La ricercje e conferme la vitalitât de lenghe furlane: lis personis che le fevelin in maniere ative a son cirche 444.000, plui de metât de popolazion dai teritoris indagâts. Il numar al rive a cirche 700.000 tignint cont ancje di cui che le capis.

Une lenghe ancjemò presinte intes fameis

Il furlan al continue a vê un rûl impuartant te trasmission familiâr: il 51% dai intervistâts lu declare tant che lenghe fevelade dai gjenitôrs, il 44%, invezit, lu dopre cu la mari e cul pari.

Plurilinguism percepît tant che valôr

Il 79% dai intervistâts al calcole che cressi intun contest plurilengâl al rapresenti un vantaç e no che al impedissi l’aprendiment scolastic.

La domande di furlan a scuele e cres

Cuasi il 70% dal campion al declare di jessi a pro di une presince plui significative dal furlan tes scuelis; ancje tal Venit orientâl (59%) chest valôr al reste alt.

Fuarte identitât culturâl

Il sens di apartignince furlane al ven fûr a fuart: il 52% dai intervistâts si sint “une vore” furlan, percentuâl che e rive al 75% cjapant dentri ancje cui che si definis “avonde” furlan.

Plui supuart aes politichis linguisticis

Il 77% dal campion al è a favôr dal doprâ risorsis publichis par sostignî la lenghe furlane. Il valôr adeguât pai intervistâts al corrispuint a 22 euros parom par an.

Furlan simpri plui presint tal digjitâl

La lenghe e je presinte soredut inte comunicazion online e intes aplicazions di messazistiche: une persone su cuatri e dopre il furlan intai messaçs vocâi.

Al cres il ricognossiment dal furlan inte aministrazion publiche

Ancje se il furlan intai uficis publicis al ven doprât inmò in maniere limitade, il 42% dai intervistâts al volarès viodi la lenghe plui presinte ancje intai rapuarts cu la aministrazion publiche: al è un segnâl che la legjitimazion dal furlan in contescj istituzionài e formài e je daûr a cressi.